



Nik Nazmi melawat pameran selepas merasmikan Karnival Alam Kita (Setiawangsa) di Taman Tasik Titiwangsa, Kuala Lumpur, semalam. (Foto Aizuddin Saad/BH)

Tumpahan minyak cemar pantai Johor

Lebih 100 nelayan buat laporan polis

Kejadian jejas pendapatan akibat tidak dapat turun ke laut sejak tujuh hari lalu

Oleh Essa Abu Yamin dan Omar Ahmad
bhnews@bh.com.my

Kota Tinggi: Lebih 100 nelayan dari Pangkalan Jeti Nelayan Sungai Rengit, Pengerang, di sini membuat laporan polis berhubung insiden tumpahan minyak yang menjejaskan perairan, susulan pelanggaran kapal di negara jiran, Singapura.

Pengerusi Pertubuhan Kebajikan Nelayan Pangkalan Sungai Rengit, Rosli Mohd Ali, 56, berkata laporan itu dibuat berikutan kerugian ditanggung komuniti nelayan di kawasan terjejas akibat tidak dapat turun ke laut mencari rezeki.

Katanya, sejak tujuh hari lalu, mata pencarian utama berkurangan kerana tidak dapat mencari hasil laut akibat tumpahan minyak.

“Benar, kami ada membuat laporan polis di Balai Polis Sungai Rengit berhubung insiden ini pada semalam dan kelmarin. Kami meminta agar pihak insurans dan pihak berkaitan bertanggungjawab terhadap nasib kami yang tidak dapat mencari rezeki,” katanya.

Rosli yang berpengalaman lebih 30 tahun sebagai nelayan berkata pagi tadi, dua bot nelayan cuba ke laut untuk menangkap

ikan dan melihat persekitaran lautan sama ada sudah pulih atau sebaliknya, namun didapati masih terdapat tompokan minyak di perairan.

“Kami sudah seminggu tidak menangkap ikan, tiada hasil dan pendapatan juga tiada. Sebagai manusia kami juga ada perut dan mulut yang hendak diberi makan.

“Jadi pagi tadi (semalam) dua nelayan turun ke laut dengan harapan boleh memukat atau menjaring ikan, tetapi apabila melihat keadaan tidak mengizinkan mereka pulang semula ke darat.

“Kami lihat lagi dua atau tiga hari, dengan harapan keadaan tompokan minyak ini tiada di perairan. Apabila keadaan sudah bersih, kami boleh cari makan,” katanya.

Dalam pada itu, Ketua Polis Daerah Kota Tinggi, Superintendan Hussin Zamora, ketika dihubungi mengesahkan kira-kira 101 laporan polis diterima daripada persatuan nelayan berhubung insiden itu.

“Kita terima lebih kurang 101 laporan polis daripada persatuan nelayan sekitar Bayu Damai, Pengerang dan Sungai Rengit akibat tumpahan minyak di perairan Singapura.

“Laporan polis mereka ini akan dirujuk kepada Jabatan Perikanan, difahamkan untuk tuntutan sivil kepada syarikat kapal terbabit,” katanya.

Jangka selesai tujuh hari

Sementara itu, Menteri Sumber Asli dan Kelestarian Alam, Nik Nazmi Nik Ahmad, berkata kerja pembersihan sisa minyak di Pantai Sungai Rengit dan Teluk Ramunia susulan tumpahan bahan

api marin (MFO) di perairan Pengerang, Kota Tinggi dijangka selesai sepenuhnya dalam tempoh tujuh hari.

Katanya, kerja pembersihan mula dilakukan kelmarin oleh kontraktor dengan 51 orang pekerja.

“Kerja pembersihan berkenaan dilakukan di sekitar pantai Sungai Rengit iaitu di belakang Sekolah Kebangsaan (SK) Sungai Rengit dan Jeti Nelayan Sungai Rengit.

“Ia membabitkan pembersihan batu kerikil, penyemburan kawasan berbatu serta pengumpulan minyak terapung menggunakan *absorbent boom* dan *pad*,” katanya pada sidang media selepas Perasmian Karnival Alam Kita (Setiawangsa) di Taman Tasik Titiwangsa di sini, semalam.

Beliau berkata, kerja pembersihan berkenaan termasuk pengumpulan *tarball* di permukaan pantai, pengepungan air berminyak dengan menggunakan *absorbent boom* bagi mengelakkan mengalir ke arah laut dan pembersihan sisa sampah berminyak.

Dalam perkembangan berkaitan, Nik Nazmi berkata, pihaknya sudah menerima laporan mengenai penemuan sisa minyak di Pulau Cik Kamat daripada kontraktor pembersihan yang menjalankan kerja pembersihan di pulau terbabit.

Dalam kejadian 14 Februari lalu, sebuah kapal dari Belanda, *Vox Maxima* dilaporkan melonggar kapal tangki minyak dari Singapura, *Marine Honor* di Terminal Pasir Panjang, menyebabkan berlaku limpahan minyak sebanyak 400 tan mengalir ke kawasan perairan.